

O'zbekiston-Turkmaniston hamkorligini rivojlantirishning barcha yo'nalishlari muhokama qilindi



Ommaviy axborot vositalari vakillari bilan uchrashuvda Prezident Shavkat Mirziyoyev muzokaralar samarali va sermazmun bo'lganini, davlat rahbarlari ikki tomonlama hamkorlikni rivojlantirishning barcha yo'nalishlarini muhokama qilganlarini ta'kidladi.

O'zbekiston va Turkmaniston eng yaqin qo'shni, birodar mamlakatlar, vaqt bilan sinalgan ishonchli do'st va hamkorlardir.

- Turkmaniston bilan hamkorlikda xalqlarimizning ko'p asrlik do'stligi, tarixiy va madaniy o'xshashligi, dini, ma'naviy qadriyat va an'analari mushtarakligiga asoslangan strategik sheriklik darajasiga erishilganini yuksak qadrlaymiz. Bugungi muzokaralar natijalari hamkorlikni yanada mustahkamlashga intilishimiz samimiyligi va qat'iyligini yana bir bor yaqqol ko'rsatdi. Birodar Turkmaniston bilan yaxshi qo'shnichilik munosabatlarini yanada mustahkamlash O'zbekiston tashqi siyosatining ustuvor yo'nalishi ekanini alohida ta'kidlamoqchiman, - dedi Shavkat Mirziyoyev.

Davlatimiz rahbari O'zbekiston-Turkmaniston munosabatlari, ayniqsa savdo-iqtisodiy sohada ijobiy sur'at bilan rivojlanib borayotganini mammuniyat bilan qayd etdi. Keyingi yillarda mamlakatlarimiz o'rtaсидаги tovar ayriboshlash uch barobar ortdi. Pandemiya oqibatlariga qaramay, 2021-yilning o'tgan davrida o'zaro savdo hajmi yigirma besh foizga oshdi.

Bundan tashqari, tashrif doirasida o'tgan O'zbekiston-Turkmaniston iqtisodiy forumida kelishuvlar va qat'iy shartnomalarning salmoqli to'plami imzolandi.

Prezidentimiz bugun imzolangan Chegaraoldi savdo zonasini tashkil etish to'g'risidagi bitim, shuningdek, uchinchi mamlakatlarda kelayotgan importning o'rnini O'zbekiston va Turkmanistonda ishlab chiqarilayotgan va ikki mamlakat bozorlarida talab yuqori bo'lган raqobatbardosh mahsulotlar bilan

bosishga doir kelishuv o'zaro savdoni ko'paytirishga xizmat qilishini ta'kidladi.

Sanoat kooperatsiyasini rivojlantirishga alohida e'tibor qaratildi. Tomonlar energetika, qishloq xo'jaligi, sanoat, kimyo, transport va logistika sohalarida o'zaro manfaatli hamkorlikni kengaytirish va aniq loyihalarni amalga oshirishga kelishib oldilar.

Hududlararo sheriklikni faollashtirish masalalari ham muhokama qilindi. Chegaradosh viloyatlar o'rtasidagi muntazam bevosita muloqot hamda har yili O'zbekiston va Turkmaniston hududlari forumini o'tkazish iqtisodiy hamkorlikni o'stirishning yangi drayveri bo'lib xizmat qilishi borasida yakdil fikr bildirildi. Bunday formatdagi ilk uchrashuv kelgusi yilda Xivada o'tkaziladi.

Davlat rahbarlari transport sohasidagi hamkorlikni mustahkamlash zarurligini ta'kidladilar. O'zaro yuk tashish hajmi ortganini qayd etib, tomonlar transport yo'laklaridan samarali foydalanish uchun bundan buyon ham qulay sharoitlar yaratishga, shuningdek, Shimol-Janub va G'arb-Sharq yo'nalishlaridagi o'zaro bog'liqlikni mustahkamlashga xizmat qiladigan infratuzilmaviy loyihalarni amalga oshirishga kelishib oldilar.

Suv resurslari va ekologiya mavzusi, iqlim o'zgarishi masalalari mamlakatlarimiz iqtisodiyotlari uchun hal qiluvchi ahamiyatga ega. Shu munosabat bilan Prezident Shavkat Mirziyoyev Suv xo'jaligi masalalari bo'yicha O'zbekiston-Turkmaniston qo'shma komissiyasi o'z ishini boshlaganini mammuniyat bilan qayd etdi.

Muzokaralar kun tartibidan mintaqaviy xavfsizlikni ta'minlash masalalari muhim o'rinni egalladi.

O'zbekiston va Turkmaniston Prezidentlari butun Markaziy Osiyo mintaqasining barqaror rivojlanishiga ta'sir ko'rsatayotgan Afg'onistonidagi vaziyat yuzasidan fikr almashdilar.

Shu ma'noda davlat rahbarlari Markaziy Osiyo davlatlari rahbarlarining Maslahat uchrashuvlarini muntazam asosda o'tkazib borish hamda joriy yil 5-6 avgust kunlari Avazada o'tgan uchrashuvda erishilgan kelishuvlarni amalga oshirish muhim ekanini ta'kidladilar.

Yetakchilar mintaqaviy va xalqaro tuzilmalar doirasidagi yaqin muloqotni davom ettirishga kelishib oldilar.

Ikki mamlakat madaniy, ilmiy va sport doiralari o'rtasidagi almashinuvlarni davom ettirish, yoshlar uchrashuvlari va forumlarini o'tkazish, yoshlar tashkilotlari o'rtasida yaqin hamkorlikni yo'lga qo'yish muhimligi qayd etildi. Bularning barchasi birodar xalqlarimizni yanada yaqinlashtirishga xizmat qiladi.

Tomonlar tibbiy diplomatiyaning maqsad va vazifalarini birgalikda ilgari surishga, mamlakatlarimiz xalqlari va butun mintaqaning xavfsizligini ta'minlash uchun o'zaro muvofiqlashga yondashuvni ishlab chiqishga kelishdilar.

Prezident Gurbanguli Berdimuhamedov muzokaralar natijalaridan mammun ekanini bildirdi, ikki tomonlarning hamkorlik masalalarining keng doirasi yuzasidan ishonchli va konstruktiv fikr almashilganini ta'kidladi.

- O'zbekiston Turkmanistonning muhim savdo hamkorlaridan biridir. O'zbekistonga bu galgi rasmiy tashrifning asosiy maqsadi - hurmatli Prezident, mening do'stim Shavkat Mirziyoyevni, uning rahbarligida mamlakatning davlat tizimida, ijtimoiy-siyosiy va sotsial-iqtisodiy hayotining barcha sohalarida amalga oshirilayotgan islohotlarni men qat'iy qo'llab-quvvatlashimni namoyish etish, - dedi Turkmaniston Prezidenti.

Gurbanguli Berdimuhamedov Shavkat Mirziyoyevga Turkmaniston delegatsiyasiga ko'rsatilayotgan samimiyl mehmono'stlik va do'stona qabul uchun minnatdorlik bildirdi.



Ozzbekiston Respublikasi Prezidentining
MATBUOT XIZMATI

Ozbekiston Respublikasi Prezidentining
MATBUOT XIZMATI



✖



Özbekiston Respublikasi Prezidentining
MATBUOT XIZMATI



Manba